

# La renta da l'AVS duai vegnir auzada per 70 francs il mais

Las midadas essenzialas en la chombra pitschna

DA LUCAS DEPLAZES / ANR

**■ En la debatta da detagi ha il cussegli dals chantuns prendì diversas decisiuns impurtantass. Per compensar la reducziun da las pensiuns vul el auzar la renta minima da l'AVS per almain 70 francs.** Tar la discussiun d'entrada ha cusseglier federal Berset punctuà che las propostas davart la prevenziun per la vegliadetgna na sajan betg «il project Berset», mabain il concept cumplessiv dal cussegli federal. En pliras e lungas sesidas ha tractà il cussegli federal tut las du-mondas davart la prevenziun per la vegliadetgna e formulà la missiva al parlament. La pratica haja demussà ch'ina refurma da las ovras socialas saja necessaria almain mintga 20 onns. Il svilup demografic – e na l'augment da l'aspectativa da vita – sforza il cussegli federal d'agir. Fin l'onn 2030 sajan las rentas garantidas. Suenter stoppian ins quintar cun deficits massivs tar l'AVS da set fin nov milliardas francs l'onn.

## 70 francs dapli renta

Ina lunga ed intensiva discussiun ha il cussegli dals chantuns manà davart l'augment da las novas rentas. Quai è bain la dumonda centrala da la refurma e la clav per augmentar l'acceptanza dal suveran. Chapibel ch'ils interess èn stads fitg cuntravers. Ina proposta da minoritad (*Paul Rechsteiner* (ps/SG) da conceder il supplement da 70

francs era a las persunas che retiran già l'AVS, è vegnida retratga en vista a las consequenzas finanziaras e per betg periclitar la refurma. Ina ulteriura minoritad, representada da *Felix Gutzwiller* (pld/ZH), refusa in augment da las novas rentas e fa attent a las consequenzas per l'economia. In augment da las rentas surpassia la finamira da consolidar e da mantegnair il nivel da las rentas.

*Urs Schwaller* (pcd/FR) ha admonì da tegnair en egl la finamira da la refurma. Quella pretenda diversas mesiras da gulivaziun. Per compensar tschertas sperditas (reducziun da las pensiuns, auzament da la vegliadetgna da renta per las dunnas) vul il cussegli dals chantuns augmentar las novas rentas per 70 francs il mais. Ina equalitat per pèrs maridads – quai vul dir la renta dubla (in vegl postulat da la pcd) – na saja actual-maint betg pussaivla, ha accentuà Schwaller. En l'avegnir duai la renta per consorts dentant vegnir augmentada sin 155% (actual-maint 150%) quai che muntass in supplement maximal da 226 francs il mais. Quests augmenti custan annualmain 1,4 milliardas francs. Cun 27 cunter 17 vuschs ha il cussegli dals chantuns approvà la proposta da la cumissiun d'augmentar las rentas.

## 65 onns per um e dunna

Cun 37 cunter otg vuschs ha il cussegli dals chantuns decidì d'auzar la vegliadetgna da

renta per las dunnas sin 65 onns e da procurar per l'equalitat da la vegliadetgna da renta per um e dunna. L'adattaziun duai succeder pass per pass. En l'avegnir duai valair ina vegliadetgna da referencia da 65 onns, uschebain tar l'AVS sco per las cas-sas da pensiun. Cun 65 onns duai mintgi pudair retrair la renta entira. Tgi che vul ir pli baud en renta sto acceptar ina reducziun, tgi che lavura sur 65 onns or profite-scha d'ina renta pli auta. Quella flexibili-saziun da la vegliadetgna da renta vala per ils onns 62 fin 70.

## Pensiuns pli bassas

Plinavant ha il cussegli dals chantuns reduci la tariffa da conversiun sin il sectur da la prevenziun professiunala da 6,8% sin 6%. Concret mutta quai che tgi che ha in cha-pital da 100 000 francs en sia cassa da pensiun retira en l'avegnir 6000 francs empè da 6800, quai mutta ina reducziun da 12%. Quella mesira saja necessaria en vi-sta als tschains minimals sin ils chapitals ed ils mancos en las cassas. Quella mesira saja er stà in dals motivs d' augmentar la ren-ta da l'AVS.

## Finanziaziun

Sco consequenza da l'augment da las novas rentas ston era las contribuziuns vegnir adattadas. Vegn il concept dal cussegli dals chantuns acceptà ha quai era consequenzas per las contribuziuns. En l'avegnir s'augmentan las contribuziuns dals lavurers sin lur pajás da 4,2% sin 4,35%. Las medemas contribuziuns surpiglian er ils patrunz. Na-ginas midadas vul il cussegli dals stadiis far tar ils dretgs da renta per las vaivas e per ils orfans. Il cussegli federal vuleva stritgar las rentas da vaivas senza uffants. Per garantir la finanziaziun da la refurma propona il cussegli federal d'augmentar la taglia sin la plivalur per 1,5% ed in sistem d'adattaziun automatic en cas che las reservas sa sbassan sut 70%. La cumissiun dal cussegli dals chantuns propona in augment da la taglia sin la plivalur dad 1% e refusa in automati-sem en cas da deficits. En ina tala situa-zioni duai il parlament prender a temp las mesiras necessarias.



Cusseglier dals stans **Paul Rechsteiner** (ps SG) en discussiun cun cusseglier dals stans **Stefan Engler** (pcd GR). Davostiers cusseglier dals stans **Martin Schmid** (pld GR). KEYSTONE